

setzen solle / mit was künsten / das wasser auß den schächten gschöpfft werde: wie den aller tieffsten schächten vnd lengsten stollē / das wetter zu bringen seye: dann so dessen zu viel oder zu wenig ist / so wirt das wetter dadurch gehindert: darnach vonn den zweien gschlechten / auch wie sie sampt den stollen zūbauwen seindt / vnd zūletzt / wie ein schwebender gang / darzu ein gestöck / vnd klüfft zehauwen seyendt. Fürwar ein bergkman so er ein tieffen gang entblöst / so hebt er ein schacht an zūsinckē / vñ setzet über in einē haspell / vñ ein kaur / das es nicht in schacht regne / auch nicht die haspeler vor kelte erstarrēdt / oder sonst vom regen verdrossen werden. Es setzendt auch die haspeler ihre lauff karrenn darein / die heuwer jren hauwerzeug / vnd andere ding. Bey der kaur wirt ein anderer auffgericht / den der steiger bewont / vñnd die andere taglöhner / in welchem das arz mitt sampt anderen dingen / die man in der erden hauwt / zūsamē getragen werden. Wiewol aber ertliche nuhr ein kaur machen / doch dieweil zum zeiten kinder / vnd auch thier zum zeiten in die schächt hinab fallindt / so richtet auff der mehrer teill der bergkleuten mitt güttē rhat / ein anderen neben disem / oder vndercheiden die selbige von einander / nuhr mitt einer rigellwandt. Aber es ist der schacht gwonlichen ein graben zweier lachtern lang / vnd zwei drittell eines lachters breit / vnd dreizehen lachter tieff / aber doch wirt von wegen des stollens / der zum ersten in berg getriben wirt / ein schacht zum zeiten nicht acht lachtern tieff / zum zeiten mehr oder weniger dan vierzeihen lachter. Es wirt aber ein schacht / seiger gericht gsinckem / oder in die flach / nach dem der gang / welchen die bergkleut hauwen / seiger gericht oder flach streichet. Aber ein stollen ist ein grüben vnder der erden in die lēge getriben / zweimal höher dan breiter / das die arbeiter / vnd ander leut durch sie faren / vnd jre läst auß führen mögen. Es pflegt aber ein stollen ein lachter vnd den vierdtē teil hoch zu sein. Der halben so ist er breit bey dreien werckschühen / vnd einer spannen / den selbigen seindt gwont zu treiben zwen hauwer / vnder welchen der ein das oberteil / der ander das vnderteil außhauwet / vnd diser ghett vor / der ander folgt hernach / beide aber sitzendt auff sitz pfälen / die vō ligenden zum hangenden enger seindt: oder so ein gang vest ist / sitzen sie auff pfälen / die oben breit / vnden aber schmäler seindt / vnd in den gang gschlagen. Die bergkleut aber graben viel schächt / nicht allein richt schächt / sonder auch flache schächt / vñnd derenn eintweders kompt nicht bis zum stollen / zum teill fallendt sie zum stollen / zu ertlichen kompt der stollen / so er in dise tieffe / in welchem sie in disen so dem berg vndergraben / gsengt seindt / noch nicht getriben ist.